

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**MIŠLJENJE**

**na Prijedlog Pravilnika o uslovima za obavljanje energetske djelatnosti proizvodnje i isporuke toplotne energije**

**Sarajevo**  
**Juli, 2024. godine**



Broj: 07-26-7-008-6/24  
Sarajevo, 01.07.2024. godine

Na osnovu člana 25. stava (2) Zakona o konkurenciji („Službeni glasnik BiH“, broj 48/05, 76/07 i 80/09), postupajući po zahtjevu za mišljenje Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo, Konkurencijsko vijeće Bosne i Hercegovine je na 9.(devetoj) sjednici održanoj dana 01.07.2024. godine, donijelo

### **M I Š L J E N J E**

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 02.04.2024. godine pod brojem: 07-26-7-008-1/24 zaprimilo Zahtjev za mišljenje na Nacrt Pravilnika o uslovima za obavljanje energetske djelatnosti proizvodnje i isporuke toplotne energije (u daljem tekstu: Zahtjev), Ministarstva komunalne privrede, infrastrukture, prostornog uređenja, građenja i zaštite okoliša Kantona Sarajevo, Reisa Džemaludina Čauševića br. 1, 71 000 Sarajevo (u daljem tekstu: Ministarstvo ili Podnosilac zahtjeva).

Uvidom u odredbe Nacrta Pravilnika o uslovima za obavljanje energetske djelatnosti proizvodnje i isporuke toplotne energije (u daljem tekstu: Nacrt Pravilnik), Konkurencijsko vijeće je utvrdilo sljedeće:

Odredbe Nacrta Pravilnika primjenjuju se na pravna lica koja obavljaju energetske djelatnosti propisanu Uredbom o opštim uslovima za proizvodnju, isporuku i korištenje toplotne energije ("Službene novine Kantona Sarajevo“, broj: 22/16 i 4/23).

Nacrtom Pravilnika se propisuju uslovi i postupak za izdavanje, produženje i prestanak važenja Uvjerenja za obavljanje energetske djelatnosti (uvjerenje), oblik, sadržaj i način vođenja registra izdanih i oduzetih uvjerenja, kao i to da postupak izdavanja, produženja i prestanka važenja uvjerenja vodi Ministarstvo koje uspostavlja i vodi javni registar izdanih i oduzetih uvjerenja.

U članu 5. Nacrta Pravilnika su propisani opšti uslovi za obavljanje energetske djelatnosti:

„ (1) Uvjerenje za obavljanje energetske djelatnosti izdaje se pravnom licu koje je registrovano kod nadležnog suda za obavljanje energetske djelatnosti i ima upisanu pretežnu djelatnost prema trenutno važećoj Klasifikaciji djelatnosti Bosne i Hercegovine (KD BiH 2010) - 35.30 Proizvodnja i snabdijevanje parom i klimatizacija.

(2) Uvjerenje za obavljanje energetske djelatnosti neće se izdati pravnom licu:

- a) nad kojim se vodi postupak likvidacije,
- b) ako se protiv odgovornog lica ili članova uprave vodi krivični postupak
- c) ako su odgovorno lice ili članovi uprave pravnog lica u posljednjih pet godina pravosnažno osuđeni za krivično djelo u vezi sa obavljanjem privredne djelatnosti za koju se zahtijeva izdavanje uvjerenja,
- d) ako je odgovornom licu ili članovima uprave podnosioca zahtjeva za izdavanje uvjerenja izrečena mjera zabrane obavljanja privredne djelatnosti za koju se zahtijeva izdavanje uvjerenja,

e) kojem je oduzeto uvjerenje za obavljanje energetske djelatnosti u posljednjih pet godina koje prethode godini podnošenja zahtjeva.“

Propisano je da je pravno lice, podnositelj zahtjeva za izdavanje uvjerenja, u obavezi ispuniti posebne uslove koji se tiču tehničke sposobnosti, stručne osposobljenosti i finansijske sposobnost za obavljanje energetske djelatnosti u smislu odredbi člana 6. Nacrta Pravilnika.

Član 7. Nacrta Pravilnika propisuje tehničku sposobnost za obavljanje energetske djelatnosti:

„(1) Pravno lice je tehnički sposobno za obavljanje energetske djelatnosti ukoliko raspolaže toplifikacionim sistemom, te upotrebom dozvolom i drugom dokumentacijom prema propisima kojima se uređuje područje prostornog uređenja i građenja na osnovu kojih se toplifikacioni sistem može staviti u pogon i koristiti za obavljanje energetske djelatnosti

(2) Pravno lice može toplifikacioni sistem ili dio toplifikacionog sistema iz stava (1) ovog člana imati u svom vlasništvu ili ga koristiti na osnovu ugovora o zakupu ili drugog ugovora zaključenog sa vlasnikom.

(3) Pravno lice dužno je uz zahtjev za izdavanje uvjerenja za obavljanje energetske djelatnosti dostaviti ministarstvu dokaz o vlasništvu ili ugovor/ugovore iz stava (2) ovog člana.“

Stručna osposobljenost za obavljanje energetske djelatnosti je propisana članom 8. Nacrta Pravilnika:

„(1) Pravno lice je stručno osposobljeno za obavljanje energetske djelatnosti ako zapošljava dovoljan broj stručno osposobljenih radnika za obavljanje energetske djelatnosti i/ili ima zaključene ugovore sa drugim pravnim licima stručno osposobljenim za obavljanje energetske djelatnosti.

(2) Pod stručno osposobljenim radnicima iz stava (1) ovog člana smatraju se zaposlenici odgovarajuće kvalifikacije odgovorni za rad i nadzor nad radom toplifikacionog sistema kojim se obavlja energetska djelatnost u skladu sa zakonskim propisima, standardima i tehničkim propisima koji sa pravnim licem koje je podnijelo zahtjev za izdavanje uvjerenja imaju zaključen ugovor o radu.

(3) Pravno lice iz stava (1) mora imati najmanje jednog tehničkog rukovodioca koji mora biti diplomirani inženjer odgovarajuće tehničke struke koji posjeduje neophodno znanje iz oblasti projektovanja, izgradnje, pogona i održavanja termoenergetskih objekata za proizvodnju i distribuciju toplotne energije sa položenom stručnom ispitom iz odgovarajuće oblasti.

(4) Pravno lice iz stava (1) mora imati dovoljan broj stručno osposobljenih radnika za rukovanje termoenergetskim objektima sa obrazovanjem prema zahtjevima stručnih zadataka, a u skladu sa važećim zakonskim propisima i tehničkim pravilima.

(5) Pravno lice iz stava (1) mora imati dovoljan broj stručno osposobljenih radnika za održavanje i servisiranje termoenergetskih objekata u skladu sa vrstom ugrađene opreme, zakonskim propisima i tehničkim pravilima.

(6) Za potrebe utvrđivanja dovoljnog broja stručno osposobljenih radnika iz stava (4) i stava (5) ovog člana mogu se uzeti u obzir zaposlenici odgovarajuće stručnosti koji poslove obavljaju u razmjernom dijelu svog ukupnog radnog vremena zavisno od obima obavljanja energetske djelatnosti.

(7) Pravno lice koja je podnijelo zahtjev za izdavanje uvjerenja za obavljanje energetske djelatnosti može za potrebe obavljanja poslova iz stava (4) i stava (5) ovog člana sklopiti ugovore sa drugim pravnim subjektima.

(8) Pravno lice je dužno uz zahtjev za izdavanje uvjerenja za obavljanje energetske djelatnosti dostaviti ministarstvu ugovore s drugim pravnim licima koji imaju utjecaja na stručnu osposobljenost pravnog lica za obavljanje energetske djelatnosti.“

Uz zahtjev za izdavanje uvjerenja za obavljanje energetske djelatnosti pravno lice je dužno prema članu 11. Nacrta Pravilnika ministarstvu dostaviti sljedeću dokumentaciju:

- „a) dokaz da je registrovano za obavljanje energetske djelatnosti, te da nema zapreka za izdavanje uvjerenja iz člana 5. stav (2),
- b) dokaz da je tehnički sposobno za obavljanje energetske djelatnosti,
- c) dokaz da je stručno osposobljeno za obavljanje energetske djelatnosti,
- d) dokaz da je finansijski sposobno za obavljanje energetske djelatnosti,
- e) Prijedlog Tarifnog sistema sa Metodologijom i kalkulacijom cijene usluge proizvodnje i isporuke toplotne energije, sa jasno definisanim normativima utroška energenata
- f) dokaz o uplati naknade za izdavanje uvjerenja koji se dostavlja naknadno nakon donošenja odluke Vlade Kantona Sarajevo u skladu sa članom 33 pravilnika.

(2) Popis dokumentacije i dokaza za izdavanje uvjerenja nalazi se u Prilogu I. ovog pravilnika i njegov je sastavni dio.“

U Nacrtu Pravilniku je pored navedenog u poglavlju II *Izdavanje i produžavanje uvjerenja za obavljanje energetske djelatnosti* propisano: valjanost dokaza, donošenje rješenja kojim se izdaje ili odbija uvjerenje za obavljanje energetske djelatnosti, rok za donošenje rješenja, uvjerenje za obavljanje energetske djelatnosti, odustajanje od zahtjeva za izdavanje uvjerenja, obaveze energetskog subjekta i nadzor nad radom energetskog subjekata, produženje uvjerenja za obavljanje energetske djelatnosti, razdoblje produženja važenja uvjerenja, stručna komisija za ocjenu ispunjavanju uslova za izdavanje uvjerenja, nadzor nad radom energetskog subjekta, otklanjanje nedostataka.

Nacrtom Pravilnika su takođe uređeni i propisani prestanak važenja uvjerenja za obavljanje energetske djelatnosti, registra uvjerenja za obavljanje energetske djelatnosti, naknada za izdavanje uvjerenja, kao i prelazne i završne odredbe.

U Obrazloženju Nacrta Pravilnika su navedeni razlozi za donošenje:

U dijelu V. Zakona o komunalnim djelatnostima ("Službene novine Kantona Sarajevo", br. 14/16, 43/16, 10/17 - Ispravka, 19/17, 20/18 i 22/19), članom 13. stav (1) propisani su uslovi koje moraju ispunjavati davaoci komunalnih usluga za obavljanje komunalnih djelatnosti kako slijedi: da su registrovani za obavljanje komunalne djelatnosti; da posjeduju odgovarajuću opremu i sredstva za obavljanje komunalnih djelatnosti; da raspolazu odgovarajućim stručnim kadrovima koji mogu obezbjediti stalno i kvalitetno obavljanje komunalnih djelatnosti; da obezbjeđuju vršenje komunalnih djelatnosti u skladu sa odredbama ovog zakona i drugih propisa; da cijenu komunalnih usluga obrazuje prema važećim propisima; da utvrde normative rada i utroška materijalnih sredstava i omoguće kontrolu istih od strane nadležnih organa; da uspostave tarifni sistem koji će biti osnova za naplatu usluga; da kontinuirano rade na podizanju nivoa komunalnih usluga i unapređenju komunalnih djelatnosti.

Stavom (2) člana 13. propisano je da na osnovu naprijed navedenih dokaza o ispunjavanju uslova, nadležni organ za komunalne poslove Kantona, Grada i općine izdaje uvjerenje.

Članom 4. stav (4) Uredbe o opštim uslovima za proizvodnju, isporuku i korištenje toplotne energije ("Službene novine Kantona Sarajevo, broj 22/16, 4/23) određuje se obaveza donošenja Pravilnika o uslovima za obavljanje energetske djelatnosti proizvodnje i isporuke toplotne energije kojim se propisuju uslovi za izdavanje, produženje i prestanak važenja Uvjerenja za obavljanje energetske djelatnosti (u daljem tekstu uvjerenje), te oblik, sadržaj i način vođenja registra izdanih i oduzetih uvjerenja.

Uredbom je propisano da postupak izdavanja, produženja i prestanka važenja uvjerenja vodi resomo ministarstvo, odnosno Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo koje uspostavlja i vodi javni registar izdanih i oduzetih uvjerenja.

Davalac usluge/energetski subjekt može obavljati energetske djelatnosti proizvodnje i isporuke toplotne energije u skladu sa Zakonom o komunalnim djelatnostima i Uredbom samo na osnovu izdatog uvjerenja o ispunjavanju uslova za obavljanje ove djelatnosti.

Uvidom u tekst dostavljenog propisa, uočena je potreba za pojašnjenjem odredbi iz čl. 5. i 8. Nacrta Pravilnika, zbog čega je Konkurencijsko vijeće aktom broj: 07-26-7-008-2/24 od 30.04.2024. godine zatražilo da se pojasni zašto je propisano da pravno lice ima upisanu **pretežnu** djelatnost (KD BiH 2010)-35.30 Proizvodnja i snabdjevanje parom i klimatizacija i šta to u praksi tačno znači, pojašnjenje pojmova „odgovarajuće tehničke struke“ i „dovoljan broj stručno osposobljenih radnika odgovarajuće kvalifikacije, te da li je nekim pravnim aktom već definisano i precizirano koji je to broj i koja je struka tehničkog osoblja sa kojim pravno lice mora raspolagati prilikom obavljanje djelatnosti.

Ministarstvo komunalne privrede, infrastrukture, prostornog uređenja, građenja i zaštite okoliša Kantona Sarajevo je aktom „Pojašnjenje odredbi iz nacrta Pravilnika o uslovima za obavljanje energetske djelatnosti proizvodnje i isporuke toplotne energije,„ zaprimljenim dana 10.06.2024. godine pod brojm: 07-26-7-008-4/24 navelo kako slijedi:

*„Pojašnjenje u vezi sa članom 5.*

U nacrtu Pravilnika, članom 5. stav (1) - Opšti uslovi za obavljanje energetske djelatnosti propisano je da se Uvjerenje za obavljanje energetske djelatnosti izdaje pravnom licu koje je registrovano kod nadležnog suda za obavljanje energetske djelatnosti i ima upisanu pretežnu djelatnost prema trenutno važećoj Klasifikaciji djelatnosti Bosne i Hercegovine (KD BiH 2010) - 35.30 Proizvodnja i snabdjevanje parom i klimatizacija.

Pravno lice ne može započeti sa obavljanjem djelatnosti koja nije registrovana u nadležnom sudu. Prijava za registraciju sadrži pretežnu djelatnost subjekta upisa i druge podatke potrebne za provođenje postupka razvrstavanja pravnog lica prema klasifikaciji djelatnosti kod nadležnog organa za razvrstavanje subjekata po djelatnostima. Članom 13. stav a) Zakona o komunalnim djelatnostima propisuje se uslov za obavljanje komunalnih djelatnosti - da Davaoci komunalnih usluga moraju biti registrovani za obavljanje komunalnih djelatnosti. U postupku donošenja Pravilnika komisija za izradu propisa, imenovana od strane Ministarstva je, izvršila uvid u javno dostupne podatke o registraciji pravnih lica na području Kantona Sarajevo i ustanovila da su neka od pravnih lica koja su iskazala interes za podnošenje zahtjeva za izdavanje Uvjerenja registrirana za obavljanje pretežne djelatnosti:

- C 10.32 - Proizvodnja sokova od voća i povrća
- L 68.10 - Kupnja i prodaja vlastitih nekretnina;
- F 43.22 - Uvođenje instalacija vodovoda, kanalizacije i plina i instalacija za grijanje i klimatizaciju
- E 36.00 - Skupljanje, pročišćavanje i opskrba vodom
- M 71.12 - Inženjerstvo i s njim povezano tehničko savjetovanje;

Niti jednu od navedenih ne prepoznaje Zakon o komunalnim djelatnostima, niti Zakon o regulaciji energetske djelatnosti u Federaciji BiH.

*Pojašnjenje u vezi sa članom 8. stav (5)*

Tokom javnih konsultacija u vezi sa nacrtom Pravilnika i razmatranja prijedloga za izmjene i dopune u članu 8. stav (3) izvršena je izmjena kako bi se precizirale potrebne kompetencije tehničkog rukovodioca, pa je tako stav (3) koji je glasilo:

„Pravno lice iz stava (1) mora imati najmanje jednog tehničkog rukovodioca koji mora biti diplomirani inženjer odgovarajuće tehničke struke koji posjeduje neophodno znanje iz oblasti

projektovanja, izgradnje, pogona i održavanja termoenergetskih objekata za proizvodnju i distribuciju toplotne energije sa položenom stručnom ispitom iz odgovarajuće oblasti.“, u konačnoj verziji teksta usvojen je prijedlog iz javnih konsultacija o nacrtu, te ovaj stav glasi: „Pravno lice iz stava (1) mora imati najmanje jednog telmičkog rukovodioca, magistra ili diplomiranog inženjera mašinske struke, koji posjeduje neophodno znanje iz oblasti projektovanja, izgradnje, pogona i održavanja termoenergetskih objekata za proizvodnju i distribuciju toplotne energije sa položenom stručnom ispitom iz jedne od oblasti: energetika, procesna tehnika ili klimatizacija, grijanje i hlađenje.“

*Pojašnjenje u vezi sa korištenjem termina "dovoljan broj"*

Dovoljan broj stručno osposobljenih radnika odgovarajuće kvalifikacije znači da energetski subjekt mora angažovati dovoljan broj zaposlenika odgovarajuće kvalifikacije odgovornih za rad i nadzor nad radom toplifikacionog sistema kojim se obavlja energetska djelatnosti odnosno osigurati kontinuirano pružanje usluge korisnicima u skladu sa zakonskim propisima, standardima i tehničkim propisima i pravilima struke, a sa osnovnom svrhom osiguranja dugoročnog obavljanja energetske djelatnosti na održiv način.

Dovoljan broj zaposlenika odgovarajuće kvalifikacije za slučaj proizvodnje toplotne energije nije propisan zakonskim propisima. Podzakonskim propisom i tehničkim pravilima u oblasti gasne tehnike propisane su kvalifikacije zaposlenih u specifičnim slučajevima. Sličan slučaj je u oblasti proizvodnje toplotne energije u slučaju postrojenja sa kotlovima za proizvodnju pare visokog pritiska, odnosno u kojem se koriste posude pod pritiskom i tehničkim propisima u oblasti elektroenergetike takoder. Nadzor i kontrola u spomenutim slučajevima je već uspostavljena odgovarajućim zakonskim i provedbenim propisima, a nadležnost za nadzor poštivanja propisa imaju inspekcijski organi na nivou BiH, FBiH i jedinica lokalne samouprave ali i posebna radna tijela ili stručni komiteti zaduženi za specifične poslove i/ili tehničke discipline.

Prema tome, dovoljan broj kvalifikovanih zaposlenika odgovornih za rad i nadzor nad radom toplifikacionog sistema je ovom slučaju pitanje efikasne organizacije obavljanja djelatnosti (ponovićemo, sa svrhom dugoročnog osiguranja obavljanja djelatnosti) na šta utjecaj imaju korištena tehnologija, instalirana oprema, režim rada postrojenja, te u nekim slučajevima specifični zahtjevi proizvođača opreme i tehnologije. Obzirom na veoma veliki izbor tehnologija i opreme koja se koristi ili se može koristiti za potrebe proizvodnje toplotne energije niti je primjenjivo, niti racionalno pokušati propisati uslove za svaki mogući pojedinačni slučaj. Osim toga, propuštanjem navođenja nekog od mogućih tehnoloških rješenja, za posljedicu će imati nemogućnost apliciranja pravnog lica za izdavanje Uvjerenja (dozvole za rad) što potencijalnog aplikanta stavlja u nepovoljan položaj i u smislu Zakona o konkurenciji BiH.

Za vašu informaciju, i kao jedan primjer, navešćemo da su u upotrebi već duže vrijeme i postrojenja za proizvodnju toplotne energije (raznolikog tehnološkog iješenja i potrebnih kompetencija za upravljanje i održavanje) koja su u potpunosti automatizirana bez potrebe za angažiranjem zaposlenika u samom postrojenju sa kontrolom i vođenjem procesa koje obavlja proizvođač i isporučilac opreme u skladu sa ugovorom sa vlasnikom postrojenja tražiocem uvjerenja. U ovom slučaju "dovoljan broj" stručno osposobljenih radnika u članu 8. stav (4) je "nula". Slično važi i u stavu (5) jer u nekim slučajevima, a ponovo u zavisnosti od vrste postrojenja održavanje vrši isključivo isporučilac/proizvođač opreme, odnosno pravno lice posebno ovlašteno i osposobljeno za te poslove.

Ispunjavanja obaveze iz člana 8. predviđeno je putem verifikacije dostavljene dokumentacije iz Priloga I, tačka 3. i tačka 4. od strane Stručne komisije iz člana 20. te provođenjem nadzora propisanog članom 21. i 22. se krajnjom sankcijom oduzimanja Uvjerenja.“

Konkurencijsko vijeće je dana 18.06.2024. godine pod brojem: 07-26-7-008-5/24 zaprimilo Prijedlog Pravilnika o uslovima za obavljanje energetske djelatnosti proizvodnje i isporuke toplotne energije (u daljem tekstu: Prijedlog Pravilnika), koji je Ministarstvo komunalne privrede, infrastrukture, prostornog uređenja, građenja i zaštite okoliša, kao predlagač, dostavilo na mišljenje u skladu sa odredbama član 25. stav (2) Zakona o konkurenciji.

Naime, radi se o podzakonskom aktu, kojim se propisuju uslovi i postupak za izdavanje, produženje i prestanak važenja Uvjerenja za obavljanje energetske djelatnosti, koji je prvobitno Konkurencijskom vijeću bio dostavljen u formi nacрта, te nakon okončanih konsultacije i uvrštenih mišljenja i sugestija učesnika na konsultacijama dostavljen je konačni Prijedlog Pravilnika na mišljenje. U svrhu utvrđivanja izmjena u tekstu propisa, urađena je uporedna analiza Nacrta i Prijedlog Pravilnika, i utvrđeno sljedeće:

Odredba član 5. stav (1) Nacrta Pravilnika koja propisuju da se Uvjerenje za obavljanje energetske djelatnosti izdaje se pravnom licu koje je registrovano kod nadležnog suda za obavljanje energetske djelatnosti i ima upisanu pretežnu djelatnost prema trenutno važećoj Klasifikaciji djelatnosti Bosne i Hercegovine (KD BiH 2010) - 35.30 Proizvodnja i snabdijevanje parom i klimatizacija, je u Prijedlogu Pravilnika izmijenjena na način da je izbrisana riječ pretežna, pa glasi:

„Uvjerenje za obavljanje energetske djelatnosti izdaje se pravnom licu koje je registrovano kod nadležnog suda za obavljanje energetske djelatnosti i ima upisanu djelatnost prema trenutno važećoj Klasifikaciji djelatnosti Bosne i Hercegovine (KD BiH 2010) - 35.30 Proizvodnja i snabdijevanje parom i klimatizacija“

Član 7. stav (1) Nacrta Pravilnika koji je glasio: „Pravno lice je tehnički sposobno za obavljanje energetske djelatnosti ukoliko raspolaže toplifikacionim sistemom, te upotrebnom dozvolom i drugom dokumentacijom prema propisima kojima se uređuje područje prostornog uređenja i građenja na osnovu kojih se toplifikacioni sistem može staviti u pogon i koristiti za obavljanje energetske djelatnosti“ izmijenjen je i sada glasi:

“Pravno lice je tehnički sposobno za obavljanje energetske djelatnosti ukoliko raspolaže toplifikacionim sistemom, okolinskom dozvolom, odobrenjem za upotrebu i drugom dokumentacijom prema propisima kojima se uređuju kvalitet zraka, oblast zaštite okoliša i oblast prostornog uređenja i građenja na osnovu kojih se toplifikacioni sistem može staviti u pogon i koristiti za obavljanje energetske djelatnosti“

Član 8. stav (1) Nacrta Pravilnika je propisivao „Pravno lice je stručno osposobljeno za obavljanje energetske djelatnosti ako zapošljava dovoljan broj stručno osposobljenih radnika za obavljanje energetske djelatnosti i/ili ima zaključene ugovore sa drugim pravnim licima stručno osposobljenim za obavljanje energetske djelatnosti“, izmijenjen je tako što je izbrisana riječ dovoljan i pa sada ovaj član u Prijedlogu Pravilnika glasi:

„Pravno lice je stručno osposobljeno za obavljanje energetske djelatnosti ako zapošljava broj stručno osposobljenih radnika za obavljanje energetske djelatnosti i/ili ima zaključene ugovore sa drugim pravnim licima stručno osposobljenim za obavljanje energetske djelatnosti.“

Stav (3) istog člana Nacrta Pravilnika je izmijenjen i sada u Prijedlogu Pravilnika glasi:

„Pravno lice iz stava (1) mora imati najmanje jednog tehničkog rukovodioca, magistra ili diplomiranog inženjera mašinske struke, koji posjeduje znanje iz oblasti projektovanja, izgradnje, pogona i održavanja termoenergetskih objekata za proizvodnju i distribuciju toplotne energije sa položenim stručnim ispitom iz jedne od oblasti: energetika, procesna tehnika ili klimatizacija, grijanje i hlađenje.“

U članu 17. stav (3) Nacrt Pravilnika je bilo propisano da je energetski subjekt u obavezi da do 31. maja tekuće godine a najkasnije 15 dana po završetku sezone grijanja resornom ministru dostavi Informacije o protekloj sezoni i planu priprema za predstojeću sezonu, a u Prijedlogu

Pravilnika je propisano da dostavlja Izvještaj o radu u protekloj sezoni i Plan priprema za predstojeću sezonu.

Član 22. stav (1) tačka b) Nacrta Pravilnika koja glasi: “ ako se u postupku nadzora utvrdi nesavjesno obavljanje energetske djelatnosti“ je brisana u Prijedlogu Pravilnika, pa su tako tačke c), d), e) i f), sada tačke b), c), d) i e).

Konačnim Prijedlogom Pravilnika nije propisano kada i pod kojim uslovima se vrši predaja objekta, mreže i uređaja na upravljanje drugom subjektu, dok je isto bilo propisano u članu 25. Nacrta Pravilnika.

U skladu sa članom 25. stav (2) Zakona o konkurenciji, Konkurencijsko vijeće na nacрте i prijedloge zakona i drugih propisa iz oblasti koje imaju uticaja na tržišnu konkurenciju, daje mišljenje o njihovoj usaglašenosti sa ovim zakonom.

Shodno navedenom, Konkurencijsko vijeće je razmotrilo dostavljeni konačni Prijedlog Pravilnika i ocijenilo da ne sadrži odredbe koje mogu sprječavati, ograničavati ili narušavati tržišnu konkurenciju na relevantnom tržištu Bosne i Hercegovine, u smislu odredbi Zakona o konkurenciji, odnosno isti je usaglašen sa Zakonom o konkurenciji.

Ovo mišljenje je dato isključivo na osnovu podataka dostavljenih uz zahtjev za mišljenje na Prijedlog Pravilnika o uslovima za obavljanje energetske djelatnosti proizvodnje i isporuke toplotne energije, te ukoliko isti odstupa od stvarnog činjeničnog stanja ovo mišljenje se ne može primijeniti.

**Predsjednica**

**Adisa Begić**

**Dostavljeno:**

- **Podnosiocu zahtjeva**
- **U spis**